

欽定剿平三省邪匪方略

正編

四

三

新編 三才圖會

卷之四

四

四

欽定剿平三省邪匪方略正編卷八十五

戊午年

十二月初二日

辛卯

惠齡額勒登保德楞泰奏言

臣

等前將賊匪羅其清所據之太鵬寨攻克該

匪分作三四股乘隙逃竄

臣

等分路兜剿東追

西擊至雙山子地方賊匪各股會集卽在山梁

抵拒綸布春阿哈保賽冲阿阿穆勒塔溫春李
紹祖德寧楊遇春穆克登布等各帶兵勇搶上

山梁殺賊約五百餘人賊匪潰散四竄我兵兜

剿兩晝夜因賊匪散漫山路叢雜隨覓土人查

詢道路是夜四鼓仍卽帶兵緊剿又追殺一日

隨處俱有殲擒行抵距雙山子百餘里之青觀

山本有羅其清前遣夥匪數千名在彼屯踞羅

其清被剿情急連夜竄上青觀山其賊衆分佔

山梁三處周圍約有四十餘里臣等是夜於附

近分割營卡該匪等竟敢前來搶撲叠經擊退

臣惠齡額勒登保帶兵攻其前臣德楞泰帶兵

扼其後均於五鼓進擊臣額勒登保鼓勵將士

當將飯瓢梁賊卡打破殺賊四百餘人進逼賊

巢臣惠齡帶兵攻克太公石賊卡殺賊三百餘

人臣德楞泰帶兵分搶老竹山洞坪寨賊卡均

經奮力搶佔殺賊五百餘人卽合兵一處攻撲

賊巢因山勢過陡我兵俱係仰攻賊匪鎗礮
石俱下並敢集衆出寨抗拒把總胡勝賢外委
楊泰俱受礮傷陣亡叅將劉邦直千總周學光
把總馬濟勝均經受傷我兵竭力搶撲當殲賊
匪三百餘人臣德楞泰一路官兵搶近青觀山

右手山梁拋擲火彈當將草棚焚燒並卽砍破
木城賊匪尙敢捨死抗拒官兵刀砍矛戳殲斃

四百餘人始將右手山梁佔踞卽帶兵抄來

臣

惠齡額勒登保督兵由前路搶上將至山頂猝

有賊匪四五百人從上下壓當卽分派官兵將

賊截斷追至坡下鎗箭所斃及滾崖跌死者共

四百餘人乘勢將賊寨打破時總兵朱射斗同

叅領佛寧攻賊左面山梁賊匪擲石放鎗拒守

甚力都司常祿守備劉秉陽何化龍把總史可

選俱受鎗傷官兵奮勇衝殺斃賊三百餘人時

已深夜臣等分投剿殺悉將賊寨焚燒青觀山

賊巢全行攻克生擒吳士雄等二百餘人據供

羅其清見官兵破寨留人抵禦卽乘夜率衆潰

逃等語臣等一面分兵攔截並令官兵搜捕殺

賊男婦八百餘名獲有賊礮鎗矛等件探得羅

其清潰逃之後又作數股分竄隨會同商議臣

德楞泰督兵從東面抄擊並令朱射斗帶兵由

西路兜截

臣

惠齡額勒登保督兵由中路追剿

仍派兵勇各處搜捕並彼此策應三路抄殺約

斃賊匪七百餘名先後生擒及巖洞搜出竄散

賊匪共四百五十七名口內訊出頭目苟文如

魏應聘二名並係久經打仗之賊俱凌遲正法

外其餘男婦三百五十一名訊係逼脅隨從在

賊營未久當卽曉諭概行釋放令其各歸本處
臣等現仍分路截剿查賊衆俱在巴州地界羅
其清亡命狂奔並無一定處所但屢次圍截旣
不使片刻停留而又將其逼脅竄散之人予以
釋放則其黨與聞風自必陸續解散該逆勢孤
力竭諒難久延殘喘奏入

上命軍機大臣傳諭勒保惠齡額勒登保德楞泰曰

此次惠齡雖將青觀山賊巢攻克而首逆仍任奔竄迄未就獲且額勒登保德楞泰兩路俱稱殺賊四百餘人而惠齡與德楞泰前後又稱各殺賊三百餘人數目相同顯係所殺賊匪不過三四百名而各路彼此影射重複虛報若果如所奏節次所殺之賊爲數不少賊匪早應殲盡安得尙有如許之多此等誑詞豈能逃朕洞鑒惠齡等著再傳旨

嚴行申飭其打仗陣亡之把總胡勝賢外委楊泰
俱著咨部加等議卹

初四日癸巳宜綿奏言查李樹樊人傑阮正通唐

明萬龔建龍紹周等各股賊匪經臣督率慶溥

柯藩等截回四川太平之田壩河遂由城口竄

赴大寧詎行至七里峽紅花溪爲大寧鄉勇擊

退又折回城口在老鸛口一帶屯紮距安康平

利邊界不遠臣遂飛飭知縣任奎光石棐在平

利之兩扇門偏巖子等處知縣趙廷麒署縣丞

丁福志典史李林在安康之南天門黃金溝等

處分帶鄉勇各據險隘施放鎗礮大張聲勢賊

匪知有準備復由城口竄往大耳壩又與紫陽

連界臣復飛飭道員溫承惠督率知縣蔣志坦

金思義黃靖圖主簿韓穀庭等帶領鄉勇會同

柯藩及帶兵各將弁在六道河八道河二州堽

土地嶺等處分投堵禦

臣

仍駐劄石泉往來策

應可以不虞闌入賊匪勢已西趨恐其由太平

通江竄入西鄉南鄭寧沔一帶秦承恩已飛咨

王文雄回駐西鄉扼其要路恒瑞又帶兵回至

保寧賊若西奔正可由寧羌一路與副將李文

蔚之兵會同截擊是興安所屬固可無虞卽漢

中一帶亦屬有備後股賊匪似不能復行竄入
惟前此從長灘偷渡之賊探聞卽係張漢潮一

股已由縣北山竄入五郎鎮安境內現有明亮

興肇緊躡賊蹤至兩河關連打數仗殺獲甚衆

賊匪遂由小河口向羊山東竄查張漢潮係襄

陽人必思逃回湖北明亮之兵勢不能繞至賊

前臣前派之關騰在北路一帶遏其北竄西安

之路東南未免空虛

臣

督飭知府周光裕等團

集鄉勇在石泉江岸嚴密布置抽出官兵千餘
名派總兵慶溥由水路至白河縣防堵南面漫
川關如賊匪逃回湖北正可迎頭截擊與明亮
等前後夾攻惟東路商雒一帶僅有鄉勇堵禦
恐不足深恃已飛咨河南撫臣倭什布帶兵在
秦豫邊界駐紮以防竄逸奏入

上命軍機大臣傳諭勒保明亮宜綿倭什布曰賊匪
李樹等在紫陽連界之大耳壩游奕經宜綿等將
各處邊界嚴防自可無虞闌入而張漢潮一股仍
由五郎鎮安一帶向東奔竄明亮等剿辦此股賊
匪爲日已久徒事尾追且自前月十七日奏報後
迄今已半月有餘並未將殺賊情形續行具奏似
此遷延貽悞實屬不知愧勵著再傳旨嚴行申飭